

四庫全書

史部

欽定四庫全書

史部

欽定續通志卷三百四十五

六

中書_臣李采覆勘

總校官原任侍講臣王燕緒

欽定四庫全書

欽定續通志卷三百四十五

列傳

宋 四十九

蔚昭敏

高化

周美

孟元

劉謙

趙振

范恪

馬懷德

向寶

石晉

張攷

李允則

張亢

奎

劉煥

滄

趙滋

蔚昭敏字仲明開封祥符人父興從太宗平太原真宗
為襄王昭敏自東班殿侍選隸襄王府帝即位授西頭
供奉官累遷崇儀使冀貝行營兵馬都監契丹以五千
騎突至冀州城南昭敏帥部兵與戰敗之得其器甲咸
平四年領順州刺史定州行營鈐轄兼押大陣又為鎮
定高陽關三路先鋒契丹入寇帝北巡至大名契丹退
趨莫州昭敏與范廷召追至莫州東三十里斬首萬餘

級擒生口甚衆拜唐州團練使累遷至殿前都指揮使
保靜軍節度使卒贈侍中

高化字仲熙真定人少沉勇有力學擊劍善射契丹犯
河北應募轉餉飛狐口楊業留戲下使捕賊酋大鵬翼
獲之會契丹又犯真定乃辭業還家從州將入京師遂
隸禁軍選為襄王牽羈官王尹京命巡內外八廂積獲
姦盜甚衆一日王趨急召出府門馬驚墮化掖之而起
王曰微爾吾幾殆益親信之真宗即位擢御龍營直雙

員都頭累遷御龍骨朶直都虞候乾興初授天武右第二軍都指揮使榮州刺史遷天武右廂都指揮使蜀州團練使天聖六年夏大雨命護汴堤夜馳至城西堤欲壞督守兵負土不能過時夏守恩方典軍積材木城隅化盡取以塞堤乃得無患仁宗嘉之進神龍衛四廂都指揮使龔州防禦使為廊延路馬步軍副都總管徙涇原路權知渭州遷捧日天武四廂都指揮使發兵襲明珠族不利降渭州總管改興州防禦使真定路副都總

管徙高陽關路修護章惠太后園陵累拜殿前副都指揮
使歷建武軍節度使以老辭管軍詔入朝化又固請改
武安軍節度使知滄州未行改相州部有大獄已具皆
當論死化疑之遣移訊果出無罪者三人以右屯衛上
將軍致仕卒年八十贈太尉謚曰恭莊化謹質少過馭
軍有法雖起身行伍然頗知民事焉

周美字之純靈州回樂人少隸朔方軍以材武稱歸京
師天子召見隸禁軍常令宿衛天聖初德明部落寇平

涼方渠美以軍候戍邊與州將追戰破之于九井原烏崙河累遷天武都虞候元昊反陝西用兵經畧使夏竦薦其材擢供備庫使延州兵馬都監夏人既破金明諸砦美請于經畧使范仲淹曰夏人新得志其勢必復來金明當邊衝今不亟完將遂失之仲淹因屬美復城如故數日賊果來其衆數萬薄金明陣于延安城北三十里美領衆二千力戰抵暮援兵不至乃徙軍山北多設疑兵夏人望見以為救至即引去既而復出艾蒿砦遂

至郭北平夜鬪不解美率衆使人持一炬從間道上山
益張旗幟四面大譟賊懼走獲牛羊橐駝鎧甲數千計
遂募兵築萬安城而還敵復寇金明美引兵由虞家堡
並北山而下敵即引卻遷文思使徙知保定軍經畧使
龐籍表留之改東路都巡檢使敗敵于金湯城焚其族
部二十一元昊大入據承平砦諸將會兵議攻討洛苑
副使种世衡請齎三日糧直擣敵穴美曰彼知吾來必
設伏待我不如間道掩其不意世衡不聽美獨以西兵

出芙蓉谷

按長編作以兵西出芙蓉谷

大破敵世衡等果無功未幾

敵復畧土地若美迎擊于野家店追北至拓跋谷以功

遷右驎使軍還築柵于葱梅官道谷以據敵路令士

卒益種營田歲收穀六千斛復率衆繇廳子部西濟大

理河屠扎斡多葉二百帳焚其積聚以歸龐籍仲淹交

薦之除鄜延路兵馬都監遷賀州刺史又破敵于無定

河乘勝至綏州殺其酋豪因城龍口平砦敵以精騎數

千來襲美從百餘騎馳擊破之加本路鈐轄遂為副總

管遷龍神衛四廂都指揮使通州刺史進捧日天武四
廂都指揮使陵州團練使慶歷中又城清水安定黑水
佛堂北橫山乾谷王明柳谷雕巢盧兒原安砦十一堡
安定之役諜報敵數萬將大至經畧使遣管勾機宜楚
建中分諸將兵趣城黑水以待諸將憚敵且至不肯與
兵美曰兵嘗以寡擊衆何自怯也卒以兵二千與建中
而敵亦引去每邊書至諸將各擇便利獨美未嘗辭難
然所向輒克諸將以此服之歷侍衛親軍馬軍殿前都虞

候眉州防禦使步軍副都指揮使遂州觀察使廊延副都總管召還授耀州觀察使又進馬軍副都指揮使卒贈忠武軍節度使諡忠毅自陝西用兵諸將多不利美前後十餘戰平族帳二百焚二十一招種落內附者十族復城堡甚多在軍中所得祿賜多分其戲下有餘悉饗勞之及死家無餘資子蚤卒以孫永清為子官至引進副使

按宋史比下有闕守恭傳無事蹟足錄今從刪

孟元字善長洺州人少隸禁軍以挽彊選補殿侍累遷散都

頭班指揮使擢如京使并代州兵馬都監改鈐轄徙高陽關
路又從真定路王則據貝州反元赴城下攻戰被數十創又
中機石墜濠中既出戰愈力更募死士由永濟渠穴地以
進賊平改右驕驥使徙大名府路鈐轄河朔饑權知滄
州民鬻鹽為生歲荒鹽多不售民無以自給元度軍食
有餘悉用易鹽繇是民不轉徙御史中丞郭勸言其貝
州功而賞未當乃擢普州刺史遷宮苑使專管勾麟府
軍馬事護築永寧堡敵不敢動為龍神衛四廂都指揮

使忠州團練使高陽關馬步總管遷天武捧日四廂都
指揮使又遷步軍都虞候眉州防禦使并代路副都總
管判北京賈昌朝奏為大名府路副都總管徙定州路
遷馬軍都虞候徙鄜延路卒贈遂州觀察使

劉謙字漢宗開封人少補衛士數遷至捧日右廂都指
揮使領嘉州團練使兼京城巡檢元昊反改博州團練
使環慶路馬步軍總管兼知邠州謙不讀書然關訟曲
直皆區處當理前守者多強市民物以飾厨傳謙獨無

所撓夏竦奏為涇原路總管徙知涇州未行會賊寇鎮
戎軍譙引兵深入賊境破其聚落而還以功擢龍神衛
四廂都指揮使象州防禦使暴疾卒贈永清軍節度觀
察留後

趙振字仲威雄州歸信人景德中從石晉于順安軍獲
契丹陣圖授三班借職為隰州兵馬監押高平蠻叛徙
湖北都巡檢使兼制置南路以南方暑濕弓弩不利別
創小矢激三百步中輒洞穿蠻遂駭散遷慶州沿邊都

巡檢使時金湯李欽白豹神木瑪爾網羅卜藏三族尤
悍振募降羌啗以利令相攻破十餘堡欽等詣振自歸
振為置酒先醕取細仗圍財數分植百步外共射欽等
百發不中振十矢皆貫欽等皆驚誓不復敢犯明年涇
原屬羌和斯布格等叛圍平遠砦都監趙士龍戰沒振
出別道力戰抵砦奪取水泉率敢死士破圍賊走追斬
數千級徙涇原都監歷知順安保安廣信軍霸州知環
州累遷象州防禦使元昊將反為金銀冠珮隱飾甲騎

遺屬羌振潛以金帛誘取之以破其勢告隣部俾以環
為法不聽於是東茭金明萬劉諸族勝兵數萬悉為賊
所有及劉平等皆敗于三川口延州幾殆惟環慶無患
自本路馬步軍副總管擢龍神衛四廂都指揮使廊延
路副都總管知延州尋改捧日天武四廂振謂將吏曰
今賊以我夷傷必乘勝以進勢宜固守尚慮諸城不能
皆知吾謀苟延州弗支則陝西未可測此天下安危之
機也未幾賊寇塞門若振有兵幾八千被圍五月才遣

百餘人赴之若遂陷坐擁兵不救貶白州團練使知絳州未行會延德繼元家復訴于朝敕御史方偕就劾振法當斬再貶太子左清道率府率潭州安置踰年復右武衛將軍惠州團練使并代路兵馬鈐轄就遷副總管祁州團練使元昊既破豐州將襲近若振出麟州深栢堰擊破之兼領嵐憲六州軍事河外饑振設法通宕外商得米數十萬斛軍民以濟進博州防禦使改解州致仕復起為左神武軍大將軍卒子珣瑜皆工騎射珣年

十六仁宗召試便殿授三班借職景祐中自殿直進閣
門祇候除濠州兵馬都監作聚米圖經五卷又上五陣
圖兵事十餘篇以薦為緣邊巡檢使擢通事舍人招討
都監珣辭都監授兵萬人居涇原兼治籠竿城瑪展達
魯百餘帳處近塞為暴珣白府引兵二萬襲賊俘獲數
千計靜邊將劉滄殿後為賊所掩珣登阪望見從騎數
百復入拔滄之衆以出轄戢居龕谷無所屬珣與書招
之轄戢聽命改本路都監適元昊大入府檄留珣會葛

懷敏於瓦亭懷敏已屯五谷口西至馬欄城聞夏人徙軍新濠外議欲質明掩襲珣謂懷敏曰敵遠來衆倍鋒銳莫若依馬欄城布柵以扼其路守鎮我城以便餉道俟其衰擊之此必勝之道也懷敏不聽兵遂逼鎮我城越界壕抵定川未及陣夏人引鐵騎來犯珣居陣西北瑜亦在軍中戰甚力東壁兵輒潰中軍大擾珣擁刀斧手前鬪夏衆稍却軍得復陣懷敏詰朝退走就食鎮我俄夏騎四合珣被擒瑜以身免珣後卒賊中弟璞亦知

名

按宋史此下有張忠傳
無事蹟足錄今從刪

范恪字許國開封人少隸軍籍於許州選入捧日軍又
選為殿前指揮使歷行門龍旗直散原押班康定元年
元昊數寇邊擢內殿崇班慶州北路都巡檢使與攻白
豹城破之既還夏人襲其後恪設伏崖險敵半度邀擊
之多斬獲以功遷內殿承制嘗會諸道兵攻十二盤結
多丹密藏砦中流矢督戰愈力視砲石中有火爨者恪
取號於衆曰賊矢石盡用竈下甍矣於是士卒爭奮果

先得城遷供備庫副使恪有弓勝一石七斗其箭鏃如
鐸名曰鐸弓又於羽間識其官稱姓氏凡所發必中至
一箭貫二人他日取焦嵩若歸恪獨殿後為數千騎所
襲恪視矢箠止有二鐸即為引滿之勢賊遽卻嘗與總
管杜惟序鈐轄高繼隆將兵分討罕齊錫黑托輝等三
砦恪先破托輝而繼隆圍錫默不能下恪馳往取之既
又援惟序下罕齊砦改左騏驎副使夏人犯大順城諸
將皆閉城自守恪率兵二千餘戰克之改宮苑副使環

慶路兵馬都監遷禮賓使榮州刺史環慶路鈐轄洛苑
使權秦鳳路兵馬總管自龍神衛四廂都指揮使累遷
至侍衛親軍馬步軍副都指揮使歷坊州刺史解州防
禦宣州觀察使保信軍節度觀察留後以疾出為永興
軍路副都總管卒贈昭化軍節度使

馬懷德字得之開封祥符人父王東頭供奉官言懷德
可試引弓擊劒角觝補三班奉職為延州南安砦主東
路巡檢范仲淹知延州奏為兵馬監押以所部兵入賊

境破濟羅葉策二砦遷左班殿直又率蕃漢燒蕩賊海
溝茶山龍相安化十七砦三百餘帳遷右侍禁授閤門
祇候為東路都巡檢使夷哈尚給布等十八砦賊以四
萬騎犯邊趨僕射谷懷德以兵數千據谷旁高原待之
斬首二百級得畜產器械以千數遷內殿崇班又以兵
修龍安城寇不敢犯遂以廊延路都監又城綏平破賊
青化押班吹丹三砦殺獲甚衆元昊為夏國主命國子
博士高良夫與懷德會西人畫界龐籍具論其前後功

遷供備庫副使兼閤門通事舍人時用兵久民多亡散
懷德招輯有方經畧使梁適奏請推其法諸路歷知保
安軍環州環慶益利路鈐轄累遷至四方館使舒州團
練使徙鄜延路副都總管坐違法賂宦官閤士良為安
撫呂景初奏降四方館使英州刺史大名府路總管侍
衛親軍步軍都虞候象州防禦使鄜延路副都總管遷
馬軍都虞候徙環慶路環州蕃官蘇恩以其屬叛往降
之又遷殿前都虞候步軍副指揮使隨州觀察使英宗

即位遷靜難軍節度觀察留後召還卒贈安遠軍節度

使

按宋史此下有安俊傳
無事蹟足錄今從刪

向寶鎮戎軍人為御前忠佐換禮賓使涇原秦鳳鈐轄
歷真定鄜延副總管遷龍神衛四廂都指揮使嘉州團練
使卒寶善騎射年十四與敵戰斬首二級及壯以勇聞
有虎踞五原卑邪州東西百里斷人跡寶一矢殪之道
過潼關巨盜郭邈山多載關中金帛子女寶財走之盡
得其所掠神宗稱其勇以比薛仁貴及死厚恤其家

石普其先幽州人自言唐河中節度雄之後徙居太原
祖全事周為鐵騎軍使父通事太宗於晉邸普十歲給
事邸中以謹信見親補寄班祇候再遷東頭供奉官賊
邢橐駝賈禿指數百人寇掠永興諸縣命普督兵往捕
悉獲之遷內殿崇班帶御器械李順叛普為西川行營
先鋒與韓守英馬知節誅斬之遷西京作坊使
按東都事畧作
遷西京左藏庫使
欽州刺史順餘黨復寇邛蜀偽稱邛南王又
為西川都提舉捉賊使時蜀民疑不自安多欲為盜普

因馳入對面陳蜀亂由賦斂苛急農民失業宜稍蠲減之使自為生則不討而自平矣帝許之普即日還蜀揭榜諭之莫不悅服賊平累遷洛苑使富州團練使延州緣邊都巡檢使羌酋乜羽內寇普追殺之從真宗幸大名會王均叛以為川峽路招安巡檢使佐雷有終率諸將進討至天回鎮賊出拒戰普領前陣力擊破之賊退保益州王師圍城數月不下普繕軍砲又為地道攻城城破均夜半突圍由南門遁普引兵追擊于富順監均

自殺餘黨皆平遷冀州團練使契丹犯邊為保州兵馬

鈐轄北面行營押策先鋒與契丹戰廉城良

按東都事
畧作涼

城

又戰長城口獲俘甚衆徙定州路副都總管靈州失

守益兵備關中徙永興軍副都總管普上請曰臣嘗將

兵輒破一錢與別將各持半用相合為信帝為制傳信

牌又獻禦戎圖請設塹以陷敵馬并上所置戰械甚衆

徙為莫州總管初契丹南侵既而謀者言復欲大入寇

帝自畫軍事以手詔示輔臣令普統軍一萬于莫州盧

文壽王守俊監之敵騎北去則西趨順軍襲擊斷西山之路如河水已合敵由東路則劉用劉漢凝田思明以兵五千會普及孫全照為犄角徙普屯順安之西與威虜魏能保州楊延昭北平田敏為犄角內侍馮仁俊掌御劔于莫州與普不叶帝召仁俊還又令普率所部屯乾寧軍復遷普冀州團練使徙本州總管車駕幸澶淵時王繼忠已陷契丹契丹欲請和因繼忠遣人持信箭為書遺普且通密表事平遷容州觀察使為廊延路別

總管趙德明納款詔降制命普言不宜授以押蕃落使
使之總制屬羌則疆橫不可制矣乃止兼管內蕃落使
未幾徙并代路改桂州觀察使鎮州路總管遷保平軍節
度觀察留後赴本鎮帝祀汾陰還扈從至西京拜河西軍
節度使知河陽徙許州築大流堰引河通漕京師上軍
議條目二卷用將機宜要訣二圖時方崇尚符瑞而譖
請罷天下醮設歲可省緡錢七十餘萬繇是忤帝意大
中祥符九年上言商賈自秦州來言嘉勒斯賚欲陰報

曹瑋請以臣所獻陣圖付瑋可使瑋必勝帝以普言踰
分命知雜御史呂夷簡劾之獄具集百官參驗九月下
旬日不食坐普私藏天文下百官雜議罪當死詔除名
貶賀州遣使繫送流所甫至賀州授太子左清道率府
副率房州安置稍復為左千牛衛將軍其妻表求普領
小郡遷左領軍衛大將軍仁宗即位徙遷左屯衛大將
軍徙蔡州坐失保任降本衛將軍歷遷左千牛左領軍
衛大將軍起知信陽軍徙光州以私用孔子廟錢貶太

子左監門率府副率滁州安置以左衛將軍分司西京
給官第居蔡州遷大將軍卒普倜儻有膽畧凡預討伐
聞敵所在即馳赴之衆推其勇

張孜開封人母入宮乳悼獻太子孜方在襁褓真宗以
付內侍張景宗景宗遂養以為子蔭補三班奉職給事
春坊司轉殿直皇太子即位遷供奉官閤門祇候為陳
州兵馬都監五遷至供備庫使領恩州團練使真定路
兵馬鈐轄歷知莫貝瀛三州轉運使張鼎之奏冀貝驍

拔軍士上關銀鞵錢事下攷議攷言不可罷显之猶執
不已遂奏罷保州雲翼別給錢糧軍怨果叛契丹欲背
盟富弼往使命攷為副以勞遷西上閤門使知瀛州拜
單州團練使龍神衛四廂都指揮使并代副總管河東
更鐵錢法人情疑貳兵相率扣府欲訴閉門不納是日
幾亂攷策馬從數卒往諭之皆散還營遷濟州防禦使
侍衛馬軍都虞候又遷殿前都虞候加桂州管内觀察
使遷侍衛步軍副都指揮使虎翼兵教不中程指揮使

問狀屈彊不肯對乘夜十餘人大譟孜擒首惡斬之然後聞遷昭信軍節度觀察留後馬軍副都指揮使孜長於宮禁中言者請罷孜兵柄乃出為寧遠軍節度使知潞州徙陳州復召為馬軍副都指揮使御史中丞韓絳又言孜不當興兵尋以罪罷知曹州卒贈太尉謚勤惠

按宋史此下有許懷德傳無事蹟足錄今從刪

李允則字垂範濟州團練使謙溥子也少以材畧聞蔭補衙內指揮使改左班殿直太平興國七年始置權場于靜

戎軍允則典其事還使河東路決繫囚原治逋欠又使荆湖
察官吏與轉運使檢視錢帛器甲刑獄遂擢閤門祇候
濬治京師諸河泐水門鄭州水碓西川賊劉旰平上官正
議修城命允則往視還言西川以無城難守宜如議又言兵
分則緩急不為用請并屯要害以便餽餉高溪州蠻田彥
尹入寇允則以蠻徼不足加兵悉招輯之累遷供備庫副使
知潭州初馬氏暴斂州人出絹謂之地稅潘美定湖南
計屋輸絹謂之屋稅管田戶給牛歲輸米四斛牛死猶

輸謂之枯骨稅民輸茶初以九斤為一大斤後益至三十五斤允則請除三稅茶以十三斤半為定制民皆便之湖湘多山田可以藝粟而民情不耕乃下令月所給馬芻皆輸本色由是山田悉墾湖南饑發官廩賤糶因募饑民堪役者隸軍籍得萬人陳堯叟安撫湖南民列允則治狀請留堯叟以聞召還遷洛苑副使知滄州允則巡視州境濬浮陽湖葺營壘官舍間穿井未幾契丹來攻老幼皆入保而水不乏契丹解去轉西上閭門副

使鎮定高陽三路行營兵馬都監押大陣東面凡下
諸路宣敕必先屬允則省而後行契丹通好徙知瀛州
上言朝廷已許契丹和議但擇邊將謹誓約遷西上閣
門副使何承矩擇代請允則知雄州遷東上閣門使獎州
刺史河北既罷兵允則治城壘不輟契丹主曰南朝尚
修城備得無違誓約乎其相張儉曰李雄州為安撫使其
人長者不足疑既而詔詰之允則奏曰初通好不即完
治恐他日頽圯因此廢守邊患不可測也帝以為然城

北舊有甕城允則合大城為一自此甕城之人悉內城中
始州民多以草覆屋允則取材木西山大為倉廩營舍
始教民陶瓦甃標里閭置廊市邸舍水磴城上悉累甃
下環以溝塹蒔蘇植榆柳廣閭承翰所修屯田架石橋
構亭榭列堤道以通安肅廣信順安軍歲修禊事為競
渡上元舊不燃燈允則結綵山聚優樂使夜縱遊嘗得
謀釋縛厚遇之謀因出所刺緣邊金谷兵馬之數允則
曰若所得謬矣呼主吏按籍書實數與之謀請加緘印

縱還未幾諜遽至還所與數緘印如故反出彼中兵金財力地里委曲以為報一日民有訴為契丹民毆傷而遁者允則不治與傷者錢二千衆以為怯逾月幽州以其事來詰答以無有蓋他諜欲以毆人為質驗比得報以為妄乃殺諜雲翼卒亡入契丹允則移文督還契丹報以不知所在允則曰在某所契丹駭不敢隱即歸卒乃斬以徇歷四方館引進使高州團練使天禧二年以客省使知鎮州徙潞州仁宗即位領康州防禦使天聖

六年卒允則不事威儀間或步出遇民有可語者延坐與語以是洞知人情訟至無大小面訊立斷善撫士卒皆得其用盜發輒獲人亦莫知所由在河北二十餘年事功最多

張元字公壽自言後唐河南尹全義七世孫家于臨濮

少豪邁有奇節進士及第為廣安軍判官

按宋史本傳作廣平軍東

都事畧作廣安軍考宋史地理志潼川路有廣安軍又名寧西軍而無廣平據改

應天府推官治

白沙石梁二渠民無水患改大理寺丞僉書西京判官

事通判鎮我軍上言趙德明死其子元昊喜誅殺勢必難制
宜亟防邊因論京北攻守之計既而契丹聚兵幽涿間
河北增備遂起為如京使知安肅軍元昊反為涇原路
兵馬鈐轄知渭州累遷右驤驎使忠州刺史徙鄜延路
知鄜州上疏曰舊制諸路總管鈐轄都監各不過三兩
員今每路多至十四五員少亦不減十員不相統制請
每路軍馬事止以三兩員領之又涇原一路兵勢既分
不足以當大敵又比來主將與軍伍移易不定人馬強

弱配屬未均請下韓琦范仲淹分按逐路以馬步軍八千已上至萬人擇才位兼高者為總領其下分為三將一為前鋒一為策前鋒一為後陣每將以使忠臣佐三兩人分屯要害之地敵小入則一將出大入則大將出又量敵數多少使隣路出兵應接此所謂常山蛇勢也今萬人已上為一大將一路又有主帥延州領三大將鄜州一大將保安軍及西路巡檢德靖砦共為一大將則鄜延路兵五萬人矣原渭州鎮戎軍各一大將渭州山

外及瓦亭各一大將則涇原路五萬人矣弓箭手熟戶不在焉昨延州之敗蓋由諸將自守不相應援請令邊臣預定其法敵寇某所則某將為先鋒某將出某所為奇兵某將出某所為聲援某城砦相近出敢戰死士某所設覆都同巡檢則各扼要害又令隣路取某路出應仍潛用旗幟為號臣在山外策應未嘗用本指揮旗號自以五行支干別為引旗蓋兵馬出入百步之外不能相知若不預為之號必誤軍事國家承平日久失於訓

練今每指揮藝精者不過百餘人餘皆瘦弱不可用且官軍所持者步軍與強弩爾臣知渭州日見廣勇軍彊弩者三百五十人引一石二斗者僅百人餘僅及七八斗正欲閱習時易為力爾臣以跳鎗弩試皆不能張閱習十餘日裁得百餘人又教以小坐法亦十餘日又教以帶甲小坐法五十餘日始能服熟若安前弊以應新敵其有必勝之理乎又諸路騎兵不能馳險計其芻粟一馬之費可養步軍五人馬高不及格宜悉還防

監止留十之三餘以步兵代之諸路弓箭手生長邊陲
父祖効命累世捍賊乃無進擢之路何以激勸邊民竊
聞大帥議五路進師用兵以來屢出無功若一旦深入
臣切以為未可也山界諸州城砦距邊止二三百里夏
兵器甲雖精利其鬪戰不及山界部族而財糧又盡出
山界若十月後令諸將分番出界使夏人不得耕牧然
後出步兵負十日糧人日給米一升馬日給粟四升草
五分賊界有草地以半資放牧亦可減輓運之半王師

既行使嘉勒斯賚及九姓回紇分制其後必蕩覆巢穴
又言陝西民調發之苦數倍常歲宜一切權罷令安撫
司與逐州長吏減省他役顯應邊須及選殿侍軍將各
三十人以馳騾各二百留其半河中以運廊延保安軍
軍須其半留乾州或永興軍以運環慶原渭鎮戎軍軍
須分一轉運使專董其事又廊州四路半當衝要當以
閑慢路遞鋪兵卒之半貼衝要二路驛百人每三人挽
小車載二百五十斤至三百斤若團併輦運邊計亦未

至失備而民力可以寬後多施用進西上閭門使改都鈴轄屯延州又奏邊機軍政措置失宜者十事言王師每出不利此皆將不知兵之弊未深究致敗之由而為之措置徒益兵馬未見勝術一也發兵千里遠關銳氣已衰如賊已退乃是空勞師徒異時更寇別路必又如此是謂不戰而自弊二也總管雖令互相策應環州至延州十四五驛徑赴亦不下十驛涇原至秦鳳千里若發兵互援而山路險惡人馬之力已竭三也朝廷罄力供

億而邊臣但言兵少兵無節制一弊無奇正二弊無應援三弊主將不一四弊兵分勢弱五弊有此五弊如驅市人而戰雖有百萬亦無益於事四也累年敗衄而居邊要者未知何謀使更數年未罷兵國用民力何以克堪五也今言邊事者甚衆前條方行後令即變胥吏有抄錄之勞官吏無商畧之暇邊防軍政一無定制六也夏竦陳執中皆朝廷大臣今但主文書守詔令每有宣命則翻錄行下如諸處申稟則令候朝旨如是則何必

以大臣主事七也陝西日以增員所占兵士千餘人請給歲約萬緡諸州並募克敵致勝保捷廣銳宣毅等兵久未曾團結訓練但費軍廩無益邊備八也今軍有手藝者每一指揮抽占三之一如延州諸將不出即有兵二萬除五千守城之外其餘止一萬五千若有警急三日內不能圍集九也陝西教集鄉兵共十餘萬人市井無賴豈無姦盜雜於其中苟無措置他日為患不細十也既而復請面陳利害不報會元昊益熾以兵圍河外

自後河川襲府州蕃漢民被殺掠已衆攻城不能下引
兵屯琉璃堡縱遊騎鈔麟府間二州閉壁不出時豐州
已為夏人所破麟州勢孤徙亢為并代都鈐轄管勾麟
府軍馬事單騎叩城既入即縱民出采薪芻汲澗谷然
夏人猶是出鈔掠亢以州東焦山有石炭穴為築東勝
堡下城旁有蔬畦為築金城堡州北沙阮有水泉為築
安定堡置兵守之禁兵皆敗北無鬪志乃募後兵敢戰者
夜伏隘道邊擊夏人遊騎比明有持首級來獻者亢以

錦袍賜之禁兵始慚奮咸願一戰亢知可用始謀擊琉璃堡使諜伏敵砦旁草中偵知無備夜引兵襲擊大破之夏人棄堡去乃築宣威砦于步駝捍寇路時麟州饋路猶未通敕亢自護賞物送麟州敵既不能鈔遂以兵數萬趨栢子砦來邀亢所將才三千人亢激怒之士皆感厲會天大風順風擊之斬首六百餘級相蹂踐赴崖谷死者不可勝計奪馬千餘匹乃修建寧砦夏人數出爭遂戰于兔毛川亢自抗以大陣而使驍將孫岳伏短

兵強弩數千于山後亢以萬勝軍皆京師新募敵目曰
東軍素易之而怯虎翼軍勇悍陰易其旗敵果趣東軍
值虎翼卒搏戰良久伏發敵大潰不踰月築清塞百勝
中候建寧鎮川五堡麟府之路始通亢復奏今所通特
一徑爾請更增並邊諸柵以相維持則可以廣田牧壯
河外之勢會契丹欲渝盟領果州團練使知瀛州遷四方
館使涇原路經略安撫招討使知渭州遷引進使徙并
代副都總管為御史梁堅所劾奪引進使為本路鈐轄

及夏人與契丹戰河外復引進使副都總管知代州兼河東沿邊安撫事范仲淹撫河東復奏亢前所增廣堡若宜使就總其事詔既下明鎬以為不可屢牒止之亢曰受詔置堡若豈可得經畧牒而止耶坐違節度死所甘心堡若必為也每得牒置案上督役愈急及堡成乃發封自劾朝廷置不問蕃漢歸者數千戶裁減戍兵萬人河外遂為并汾屏蔽復知瀛州因言州小而人衆緩急無所容若廣東南關則民居皆在城中夏疎前在陝

西惡亢不附已特沮其役然卒城之加領眉州防禦使
復為涇原路總管知渭州曾給郊賞轉運使奏亢擅減
三司所估會疎為樞密使奪防禦使降知磁州御史宋
禧繼言亢嘗以庫銀市易復奪引進使為右領衛大將
軍知壽州改將作監知和州坐失舉徙筠州久之復為
引進使果州團練使又復眉州防禦使真定府路副都
總管遷客省使以足疾知衛州徙懷州降曹州鈐轄改
河陽總管以疾辭為秘書監未幾復客省使眉州防禦

欽定四庫全書

卷三百四十五

使徐州總管亢亢好施輕財馭軍嚴明所至有風跡民

圖像祠之仁宗念其功特贈遂州觀察使

按宋史本傳不載亢贈官

據隆平集東都事畧補

奎字仲野先亢中進士歷并秀州推官監衢州酒徐生
者毆人至死繫婺州獄再問輒言寃奎視囚籍印竅偽
深探之乃獄吏竄易卒釋徐生抵吏罪改大理寺丞知
合淝縣徙南充縣以殿中丞通判瀘州罷歸會秦州鹽
課虧絀錢數十萬事連十一州詔奎往按還奏二司發

鈔稽緩非諸州罪未幾知江州徙楚州遷太常博士召
為殿中侍御史知滑州徙邢州授度支判官出為京東
轉運使以待御史為河東轉運使進刑部員外郎知御
史雜事安撫京東募民充軍凡十二萬奏州縣吏能否
數十人還為戶部副使及分陝西為四路擢天章閣待
制環慶路經畧安撫招討使知慶州歷陝西都轉運使
知永興軍河東都轉運使加龍圖閣直學士知澶青徐
揚等州再遷吏部郎中遷右諫議大夫知江寧府還判

吏部流內銓徙審官院知河南府初全義守洛四十年
洛人德之有生祠及見奎偉儀觀曰真齊王孫也因復
與齊王祠歲餘以能政聞遷給事中歸朝京東盜起加
樞密直學士知鄆州數月捕諸盜悉平奎治身有法度
所至有治跡子燾龍圖閣直學士

按宋史此下有劉文質傳無事蹟足錄今

從
刑

劉渙字仲章保州人祖審琦簡穆皇后從姪從討李重
進戰死父文質以近親而忠謹太宗欲信任之歷知麟

慶涇代等州立戰功前後賜予異於諸將渙以父任為
將作監主簿監并州倉天聖中章獻太后臨朝久渙謂
天子年加長上書請還政后怒將黥隸白州呂夷簡薛
奎力諫得免仁宗親政擢為右正言郭后廢渙與孔道
輔范仲淹等伏闕爭之黜通判磁州尋知遼州夏人叛
朝廷議遣使通河西嘉勒氏渙請行間道走青唐諭以
恩信嘉勒氏大集族長誓死扞邊得其誓書與西州地
圖以獻加直昭文館遷陝西轉運使由工部郎中知滄

州改吉州刺史知保州州自戍卒叛後兵益驕渙至虎
翼軍謀舉城叛民大恐渙單騎徐叩營械首惡者歸斬
之一軍帖服徙登州益治刀魚船備海寇寇不敢犯歷
知邢恩冀涇澶五州恩承賊蹂踐後渙經理繕葺有叙
威令大振治平中河北地震民乏粟率賤賣耕牛以苟
朝夕渙在澶盡發公錢買之明年民無耕牛價增十倍
渙復出所市牛以元直與民澶民賴不失業歷秦鳳涇
原真定定州路總管四遷至鎮寧軍節度觀察留後熙

寧中還為工部尚書致仕渙有才畧臨事無所避然銳於進取方開拓北岷討安南渙既老猶露章請自効卒年八十一

滬字子濬以蔭補三班奉職累遷右侍禁康定中為渭州瓦亭砦監押權靜邊砦擊破党留等族斬一驍將獲馬牛橐駝萬計遷左侍禁韓琦范仲淹薦授閤門祇候又破穆寧生氏西南去洛陽二百里中有城曰水洛川平土沃又有水輪銀銅之利環城數萬帳漢民之逋逃

者歸之教其百工商賈自成完國曹瑋在秦州嘗經營
不能得滬進城章川收善田數百頃以益屯兵密使人
城主多斯納令內附會鄭戩行邊滬從召多斯納及其
酋屬來獻結公水洛路羅甘地願為屬戶戩即令滬將
兵往受地既至而氐情中變聚兵數萬合圍滬兵才千
人前後數百里無援滬堅卧因令晨炊緩食坐胡牀指
揮進退一戰氐潰追奔至石門酋皆稽顙請服因盡驅
其衆隸麾下以通秦渭之路又敗臨洮氐于城下遷內

殿崇班戡以三將兵遣董士廉助築城功未半會戡罷
四路招討使而涇原路尹洙以為不便令罷築且召洙
不聽日增版趣役洙怒使狄青械洙士廉下獄洙衆驚
收積聚殺吏民為亂朝廷遣魚周詢程戡往視洙衆詣
周詢請以牛羊及丁壯助工役復以洙權水洛城砦主
城成終以違本路安撫使節制黜一官為鎮戎軍西路
都巡檢復內殿崇班瘍發首卒居人遮道請留葬水洛
立祠城隅歲時祀之經畧司言得熟戶蕃官牛裝等狀

願得滄子弟主其城乃命其弟淳為水洛城兵馬監押
城中有碑記滄事

趙滋字子深開封人父士隆天聖中以閣門祇候為邠
寧環慶路都監戰沒錄滋三班奉職康定初以右侍禁
選捕京西叛卒有功遷左侍禁後為涇原儀渭鎮戎軍
都巡檢會渭州得勝砦主姚貴殺監押崔絢劫宣武神
騎卒叛攻羊牧隆城滋馳至諭降八百餘人貴窮走出
砦招討使令滋給賜降卒及遷補將吏滋以為如是是

歙縣續志

畧司公事建言代州寧化軍有地萬頃皆肥美可募人
田作教戰射為堡砦人以為利累遷西上閤門副使歷
知安肅軍保州會契丹民數違約乘小舟漁界河中吏
憚生事累歲莫敢禁後又遣大舟十餘自海口運鹽入
界河朝廷患之徙滋雄州滋戒巡兵舟至輒捕其人殺
之輦其舟移文還涿州漁者遂絕知瀛州彭思永河北
轉運使唐介燕度皆以滋生事請罷之朝廷更以為能
擢龍神衛四廂都指揮使嘉州團練使遷天武捧日四

肅都指揮使英宗即位領端州防禦使步軍都虞候留
再任未幾卒贈遂州觀察使滋在雄州六年契丹憚之
契丹嘗大饑舊米出塞不得過三斗滋令出米無所禁
邊人德之馭軍嚴性尤廉謹惟傲慢自譽此其短也

欽定續通志卷三百四十五

欽定四庫全書

欽定續通志卷三百四十六

列傳

宋 五十

劉平

兼濟
郭遵

任福

王珪
耿傳

武英
王仲寶
桑懌

景泰

王信

蔣偕

張忠

郭恩

張岳

張君平

盧鑑

郭諮

田敏

侍其曙

康德興

張昭遠

劉平字士衡開封祥符人父漢凝從太宗征河東岢嵐
憲州累遷崇儀使平善弓馬讀書彊記進士及第補無
錫尉擢大理評事知鄆陵縣徙南充夷人寇涓井監平
權瀘州事率土丁三千擊走之祠汾陰遷本寺丞以寇
準薦為殿中丞知瀘州夷人懲前敗不敢擾邊召拜監
察御史數上疏論事為丁謂所忌久之除三司鹽鐵判

官河北安撫改殿中侍御史陝西轉運使徙知襄州仁

宗即位遷侍御史初真宗知其才將用之丁謂乘間曰

平將家子素知兵若使將西北可以制敵後章獻太后

思謂言特改衣庫使知汾州

按東都事畧作邠州考宋史地理志汾州屬河東路

邠州屬陝西路丁謂言使將西北應是邠州

屬戶明珠摩哩族數反覆

按蕃人內

屬者謂之熟戶雖屬戶有其稱此當作熟

平潛兵殺數千人以功領賓州刺

史鄜延路兵馬鈐轄徙涇原路兼知渭州徙汝州改淮

南江浙荆湖制置發運副使召還真拜信州刺史知雄

州居四年遷忻州團練使知成德軍景祐元年拜神龍
衛四廂都指揮使永州防禦使知定州徙環慶路副都
總管進侍衛親步軍都虞候奏言元昊勢且叛宜嚴備
之尋坐被酒破鎖入甲仗庫為轉運使蘇耆所劾上疏
自列召入問狀復為步軍都虞候知澶州徙滄州副都
總管時呂夷簡為宰相臺諫官數言政事闕失平奏書
願明諭臺諫官毋令越職仍不許更相引薦論者以謂
希夷簡意改高陽關副總管實元元年以殿前都虞候

為環慶路馬步軍副總管會元昊反遷邕州觀察使為
鄜延路副總管兼鄜延環慶路同安撫使頃之兼管勾
涇原路兵馬進步軍副都指揮使靜江軍節度觀察留後
獻攻守之策曰五代之末中國多事唯制西戎為得之
中國未嘗遣一騎一卒遠屯塞上但任土豪為衆所伏
者封以州邑征賦所入足以贍兵養士由是無邊鄙之
虞太祖定天下懲唐宋藩鎮之盛削其兵柄收其賦入
彼邊方世襲宜異於此而誤以朔方李彝興靈武馮繼

業一切亦徙內地自此靈夏仰中國戍守千里運糧兵民並困其後靈武失守而趙德明懼王師問罪願為藩臣于時若止棄靈夏綏銀與之限山為界則無今日之患矣而以靈夏兩州及山界蕃漢戶并授德明故蓄甲治兵漸窺邊隙廊延環慶涇原秦隴所以不能弛備也今元昊嗣國政刑慘酷衆叛親離復與嘉勒斯賚構怨此乃天亡之時元昊國勢未彊若乘此用廊延環慶涇原秦隴四路兵馬分兩道益以蕃漢弓箭手精兵可得

二十萬收山界洪宥等州招集土豪縻之以職遣使諭
嘉勒斯賚授以靈武節度使撓河外族帳以窘元昊復
出麟府石州蕃漢步騎獵取河西部族招其酋帥離其
部衆然後以大軍繼之元昊不過鼠竄為窮寇爾何所
為哉且靈夏綏銀每歲資糧取足洪宥而洪宥州羌戶
勁勇善戰夏人恃此以為肘腋我苟得之以山為界憑高
據險下瞰沙漠此天險也廟朝之謀不知出此而爭靈
夏綏銀此議臣之罪也萬一元昊潛結契丹互為犄角

則我一身二疾不可並治請召邊臣與二府定守禦長策疏奏未報屬元昊盛兵攻保安軍時平屯慶州范雍以書召平平率兵與石元孫合軍趨土門既有告敵兵破金明圍延州者雍復召平與元孫救延州平素輕敵督騎兵晝夜倍道行平先發步軍繼進夜至三川口西十里止營遣騎兵先趨延州爭門時鄜延路駐泊都監黃德和將二千餘人屯保安北碎金谷巡檢万俟政郭遵各將所部分屯范雍皆召之為外援平亦使人趣其

行將步騎萬餘結陣東行五里與敵遇敵兵涉水為橫陣
郭遵及忠佐王信薄之不能入官軍並進殺數百人乃
退敵復蔽盾為陣官軍復擊卻之平左耳右頸中流矢
日暮戰士上首功及所獲馬語未已敵以輕兵薄戰官
軍引卻二十步黃德和走保西南山衆從之皆潰平遣
其子宜孫馳追德和當勒兵還併力抗敵德和不從驅
馬遁赴甘泉平遣軍校杖劔遮留士卒得十餘人轉鬪
三日賊退還水東平率餘衆保西南山立七柵自固敵

使人偽為戍卒遞文移平平殺之敵酋舉鞭麾騎自山
四出合擊絕官軍為二遂與元孫皆被執初德和言平
降賊朝廷發禁兵圍其家及命殿中侍御史文彥博即
河中府置獄遣龐籍往訊具得其實遂釋其家德和坐
腰斬而延州吏民亦詣闕訴平戰沒狀遂贈朔方軍節
度使兼侍中諡壯武賜信陵坊第封其妻趙氏為南陽
郡太夫人子孫及諸弟皆優遷未官者錄之弟兼濟

兼濟字寶臣以父蔭補三班奉職為襄州兵馬監押漢

江暴漲兼濟解衣涉水率衆捍城州賴以完擢閤門祇候改左侍禁郤延路兵馬都監權知安保軍徙知籠竿城夏人寇邊兼濟將兵千餘敗之屬其兄平戰沒于三川口特授內殿崇班知原州累擢至西上閤門使同管勾三班院卒

郭遵開封人少諫軍籍稍遷殿前指揮使累遷左侍禁閤門祇候為延州西路都巡檢使元昊寇延州遵以裨將屬劉平敵出驍將揚言當遵遵揮鐵杵破其腦復持

鐵槍進所向披靡會黃德和引兵先潰敵戰益急遵奮擊期必死獨出入行間軍稍却即復馬以殿又持大稍橫突之敵使人持大綦索立高處迎遵馬輒為遵所斷因縱使深入攢兵注射之被殺特贈果州團練使遵用鐵杵槍稍共九十斤其後耕者得其器于戰處乃併與其衣冠葬之

任福字祐之其先河東人後徙開封咸平中補衛士由殿前諸班累遷至遙郡刺史元昊反除莫州刺史嵐石

隰州緣邊都巡檢使奏河東地介大河斥堠疎闊願嚴
守備仁宗善之命知隴州擢秦鳳路馬步軍副總管詔
陝西增城壘器械福受命四十日而戰守之備皆具以
忻州團練使為鄜延路副總管管勾延州東路蕃部事
尋知慶州復兼環慶路副總管因經度所過山川道路
以為緩急攻守之備聽便宜夏人寇保安鎮戎軍福與
子懷亮姪壻成暉自華池鳳川鎮聲言巡邊召諸將牽
制敵勢行至柔遠砦即部分諸將攻白豹城夜漏未盡

抵城下四面合擊平明破其城焚巢穴獲牛馬橐駝委聚等以功拜龍神衛四廂都指揮使賀州防禦使改侍

衛馬軍都虞候慶厯元年

按康定無二年次年為慶厯元年今乃改正

春朝

廷欲發涇原廊延兩路兵西討詔福詣涇原計事會元

昊謀寇渭州安撫副使韓琦趨鎮戎軍出兵萬八千人

使福將之以耿傳參軍事涇原路駐泊都監桑懌為先

鋒鈐轄朱觀都監武英涇州都監王珪各以所部從福

節制琦戒福等併兵自懷遠城趨得勝砦至羊牧隆城

出敵之後諸砦相距纔四十里道近糧餉便度勢未可
戰則據險設伏待其歸邀擊之福引輕騎數千趨懷遠
城捺龍川遇鎮戎軍西路巡檢常鼎劉肅與敵戰于張
家堡南斬首數百夏人佯北懾引騎趨之福踵其後謀
傳敵兵少福等頗易之薄暮與懾合軍屯好水川觀英
屯龍落川按長編作
龍絡川相距隔山五里約翌日會兵川口
路旣遠芻餉不繼士馬乏食已三日追奔至籠竿城北
遇夏軍循川行出六盤山下距羊牧隆城五里結陣諸

將方知墮敵計勢不可留遂前格戰懾馳犯其鋒福陣
未成列賊縱鐵騎突之自辰至午陣動衆傳山欲據勝
地俄伏發自山背下擊士卒多墜崖塹相覆壓懾肅戰
死敵分兵數千斷官軍後福力戰身被十餘矢有小校
勸福自免福曰吾為大將兵敗以死報國爾揮四刃鐵
簡挺身決鬪槍中左頰絕其喉而死乃併兵攻觀英戰
既合王珪自羊牧隆城引兵四千陣于觀軍之西渭州
駐泊都監趙津將瓦亭騎兵二千繼至珪屢出畧陣陣

堅不可破英重傷不能視軍敵兵益至官軍遂大潰英
津珪傳皆死內殿崇班資贊西頭供奉官王慶侍禁李
簡李禹亨劉鈞亦戰沒軍校死者數十人士死者六千
餘人唯觀以兵千餘保民垣四嚮縱射會暮敵引去福
子懷亮亦死之方元昊傾國入寇福臨敵受命所統皆
非素撫之兵既又分出趨利故至于甚敗奏至帝震悼
贈福武勝軍節度使兼侍中賜第一區追封母為隴西
郡太夫人妻為瑯琊郡夫人錄其子及從子凡六人

王珪開封人少拳勇善騎射能用鐵杵鐵鞭年十九隸親從官累遷殿前第一班押班擢禮賓副使涇州駐泊都監元昊寇鎮戎軍珪將三千騎為策先鋒自瓦亭至獅子堡敵圍之數重珪奮擊披靡獲首級為多語其下曰兵法以寡擊衆必在暮我兵少乘其暮擊之可得志也有驍將持白幟植槍以詈曰誰敢與吾敵者槍直珪胸珪以杵碎其腦繼又一將復以槍進珪挾其槍以鞭擊殺之一軍大驚遂引去珪亦以中箭而還仁宗特遣使

撫諭之詔暴其功塞下以厲諸將是歲改涇原路都監
明年為本路行營都監勒金字處置牌賜之尋至黑山
焚敵族帳獲首級馬馳甚衆會敵大入以兵五千從任
福屯好水川連戰三日諸將皆敗任福陷圍中望見麾
幟猶在珪欲援出之軍校有顧望不進者斬以徇乃東
望再拜曰非臣負國臣力不能也獨有死報爾乃復入
戰殺數十百人鞭鐵撓曲手掌盡裂奮擊自若馬中鏃
凡三易猶馳殺數十人矢中目乃還夜中卒珪少通陰

陽數術之學始出戰謂其家人曰我前後大小二十餘戰殺敵多矣今恐不得還我死可速去此無為敵所讐也及敵攻瓦亭購甚急果如所料鎮戎之戰以所得二槍植山上其後邊人即其處立祠贈金州觀察使追封其妻錄其子光祖光世光嗣

武英字漢傑太原人父密與契丹戰沒贈西京左坊使錄英為三班借職以右班殿直為忻代州同巡檢會州將出獵敵百餘騎果入寇英領衆左右馳射悉擒獲之

以功遷左班殿直監雄州權場改右侍禁閣門祇候為
環州都巡檢使徙洪德砦主又徙慶州柔遠砦元昊寇
延州英主兵攻後橋以分敵勢擢內殿承制環慶路駐
泊都監破黨平族又從任福破白豹城還禮賓副使尋
兼涇原行營都監與任福合諸將戰張家堡斬首數千
百敵棄羊馬偽遁諸將皆趨利爭進英以為前必有伏
衆不聽福等既敗英猶力戰矢盡遇害贈邢州觀察使
錄其子姪

桑懌開封雍邱人勇力過人善用劔及鐵簡有謀畧其
為人不甚長大語言如不出其口卒遇之不知其勇且
健也常遭大水有粟二廩將以舟載之見百姓走避水
者遂棄其粟而載之得皆不死歲饑聚人共食其粟盡
而止後徙居汝潁間耕龍城廢田數頃以自給諸縣多
盜懌自請補耆長得往來察姦里老父子死未斂盜夜
脫其衣去父不敢告縣懌疑少年王生者夜入其家得其
衣不使之知也明日見而問之曰爾許我不為盜今里

中盜屍衣者非爾邪少年色動即推仆地縛之詰共盜者姓名盡送縣嘗之郊城遇尉出捕盜招懌飲酒與俱行至賊所藏尉怯甚將去懌曰賊在此欲何之乃下馬獨殺數人因盡縛之又聞襄城有盜十許人獨提一劍以往殺數人盡縛其餘汝旁縣為之無盜京西轉運使奏其事補郊城尉移澠池尉羣盜保青灰山有宿盜王伯者尤為民害朝廷每授巡檢使必疏姓名使捕之懌至官巡檢偽為宣頭以示懌懌不知其偽也因挺身入賊

中與伯同卧起十餘日伯遂與懌出至山口為巡檢伏兵所執懌曰巡檢懼無功爾即以伯與巡檢使巡檢俘獻京師而懌不復自言朝廷知之為黜巡檢擢懌右班殿直永安縣巡檢明道末京西旱蝗有惡賊二十三人樞密院召懌至京師授以賊名姓使往捕懌曰盜畏吾名必潰潰則難得矣宜先示之以怯至則閉柵戒軍吏不得一人輒出居數日軍吏不知所為數請出自効輒不許夜與數卒變為盜服以出跡盜賊所嘗行處盡得

居處之實明日部分軍士盡擒諸盜手殺三人凡二十
三人者一日皆獲還京師樞密吏求銀為致閤門祇候
懌不可更怒匿其功狀除兵馬監押未行會宜州蠻叛
殺海上巡檢官軍不能制因命懌往盡手殺之還乃授
閤門祇候懌讓其賞以歸已上者或譏以好名懌益辭
不許寶元初遷西頭供奉官廣西駐泊都監元昊反參
知政事宋庠薦其有勇略遷內殿崇班廊延路兵馬都
監踰月徙涇原路屯鎮戎軍與任福遇敵于好水川力

戰而死贈解州防禦使子湜皇城使

耿傳字公弼河南人祖昭化為蜀州司戶參軍罵賊不屈而死傳少喜俠高氣初以父蔭為三班奉職換伊陽縣尉歷明州司理參軍遷將作監丞知永寧縣河南守宋綬薦其材遷通判儀州徙慶州時議西討以傳督一道糧饋會元昊入寇參任福行營軍事遇敵姚家川諸將失利敵騎益至武英勸傳避去傳不答英嘆曰英當死君文吏無軍責朱觀亦謂傳避賊鋒而傳愈前指顧

自若被數創乃死始傳與觀營籠落川夜作書遺福以持重自寫題觀傳死後韓琦得其書奏上之詔贈傳右諫議大夫官其子瑗璩璋珪琬

王仲寶字器之密州高密人初為刑部吏補齊州章邱尉以捕羣盜有功用薦召對改右班殿直為鎮定保深永寧天雄六州軍巡檢又以捕賊功遷左班徙河北西路提舉捉賊擒磁州名賊王遇仙等擢閤門祇候捕登州海賊百餘人還為河北提舉捉賊又捕斬百餘人知

信安軍復為河北提舉捉賊有盜百餘依西山官軍不能捕仲寶悉招出隸軍籍奏以自隨徙澤潞晉絳慈隰威勝軍巡檢使至官才八日獲太行山宿賊八十人累賜金帛緡錢使契丹積遷內殿承制天聖初知鎮戎軍改供備庫副使破康諾爾詔獎其功凡五年還巡護惠民河堤岸遷供備庫使麟府路兵馬鈐轄知麟州會鎮戎軍蕃族內寇徙涇原路鈐轄復知鎮戎軍又徙原環二州以西京左藏庫使惠州刺史知利州徙并代州鈐

轄改西上閭門使建言緣邊博糴羌苦之數逃去請寬其法使得復業以捍邊境久之遷東上閭門使元昊寇延州仲寶將兵至賀蘭谷以分兵勢敗蕃將羅布于長雞嶺遷四方館使領濮州團練使為涇原路總管安撫副使兼管勾秦鳳路軍馬事與西羌戰六盤山俘馘數百人時任福大敗好水川別將朱觀被圍于姚家堡仲寶以兵救之拔觀出圍乘以從馬時諸將皆沒獨仲寶與觀得還徙環慶路副都總管知慶州未幾兼本路經

略安撫招討副使破金湯城復賜詔獎諭徙澶州副總
管安撫使范仲淹奏留之明年以磁州防禦使知代州
除左屯衛大將軍致仕卒

景泰字周卿普州人進士起家補訪州軍事推官後以
尚書屯田員外郎通判慶州即上言元昊雖稱臣誠恐
包藏禍心當選主將練士卒修城池儲資糧以備不虞
三疏不報俄元昊反又上邊臣要畧二十卷遷都官知
咸州奏平戎策十有五篇會有薦泰知兵者召對稱旨

換左藏庫使知寧州任福敗徙原州元昊衆十萬一出
劉瑋堡一出彭陽城入攻渭州葛懷敏戰崆峒北敗敵
騎遇平涼至潘原泰率兵五千從間道赴原而先鋒左

班殿直張迥

按隆平集
作張尙

逗留不進泰斬以徇遇敵彭陽

西裨將夏侯觀欲退守彭陽泰不許乃依山而陣未成
列敵騎來犯泰陰遣三百騎分左右翼張旗幟為疑兵
敵欲遁去將校請進擊泰止之遣士搜捕果得伏兵與
戰斬首千餘級以功遷西上閤門使知鎮戎軍兼兵馬

鈐轄久之領忠州刺史徙秦鳳路馬步軍總管卒子思立熙寧中屢有戰功為引進使忠州防禦使知河州與棟戩部兵戰沒思忠以左藏庫副使遂州駐泊都監擊瀘州夷人陷于格穆山下兄弟繼死王事人皆憐其忠王信字公亮太原人家故饒財少勇悍大中祥符中盜起晉絳澤潞數州信應募籍軍與其徒生擒賊七十人累以功補龍神衛指揮使部使者表薦召閱其藝遷御前忠佐領河中府同幹廊延丹坊州慶成軍管界捉賊

又遷龍衛都虞候兼廊延巡檢康定初劉平石元孫戰于三川信以所部兵薄賊斬首數十級遷捧日都虞候改西京作坊使知鎮戎軍徙保安軍兼廊延路兵馬都監始至之夕敵衆號數萬傳城軍吏氣懾信領勁兵二千夜出南門與戰失其前鋒因按軍不動遲明潛上東山整軍乘勢而下擊走之獲首級馬牛居多遷鈐轄兼經畧安撫招討都監領貴州刺史葛懷敏戰敗信出兵拒敵俘斬甚衆進保州刺史就遷馬步軍都總管四路

置招討使遂為本路招討副使累遷馬步軍都虞候象
州防禦使徙高陽關路王則反貝州用安撫使明鎬奏
為貝州城下都總管城破則遁信率兵執則而還餘黨
自焚死拜感德軍節度觀察留後召為少軍副都指揮使
未至卒贈武密軍節度兼侍中

蔣偕字齊賢華州鄭縣人舉進士補韶州司理參軍以
秘書省著作佐郎為大理寺詳斷官密州豪人王澥使奴
殺一家四人偕當解及奴皆大辟宰相陳堯佐欲寬澥

判審刑院宋庠與偕持之不從偕以是知名陝西用兵
數上書論邊事遷秘書丞通判同州計置陝西錢糧逾
年為沿邊計置青白鹽使用麗籍范仲淹薦改北作坊
副使環慶路兵馬都監歷知汾涇二州徙原州邊民苦
屬戶為鈔盜偕得數輩腰斬境上盜為息遷北作坊使
兼本路鈐轄明珠康諾爾諸族數為寇偕潛兵伺之斬
首四百擒酋豪焚帳落獲馬牛羊千計徙華州兵馬鈐
轄湖南蠻唐和內寇徙潭州鈐轄賊平知忻州徙冀州

降知霸州徙恩州領韶州刺史以州倉謬為入粟數作
鈔遣持至京師交鈔得緡錢以補軍食為御史彈秦降
知坊州僕智高反除官苑使韶州團練使為廣南東西
路鈐轄賊方圍廣州徙軍沙頭安撫楊畋偕焚糧儲
退保韶州坐此降潭州駐泊都監再降北作坊使忠州
刺史命未至軍次賀州太平場賊夜入營襲殺之贈武信
軍節度觀察留後初偕入廣州即數知州仲簡留兵不
襲賊縱兵馘平民可斬左右解之乃止卒以輕肆敗

張忠開封人以材武補三班借職陝西總管司指使數
攻破堡砦殺劇賊張海郭邈山從平恩州功第一累遷
如京使資州刺史歷真定府定州高陽關京東西路兵
馬鈐轄僊智高反就移廣東領英州團練使初智高圍廣
州時洪州駐泊都監蔡保恭及知英州蘇緘以兵八千
人據邊渡村拒賊歸路忠奪而將之謂其下曰我十年
前一健兒以戰功為團練使若曹勉之於是不介騎而
前會先鋒遇賊奔忠手拉賊帥二人馬陷濘不能奮遂

中標槍死以其父率府副率致仕餘慶為左監門衛大將軍賜第一區給半俸終身封其母為河內郡夫人弟愿遷右班殿直閤門祇候官其子永壽永吉永德及其壻劉鐔封其長女

郭恩開封人初隸諸班出為左侍禁閤門祇候歷延州四路都巡檢環州肅遠砦主累遷內殿承制秦鳳路兵馬都監開古渭州路為前鋒斬首九百餘級擢崇儀副使會掌烏族叛又率兵攻討斬首八十五級遷六宅副

使累勞補崇儀使為秦隴路兵馬鈐轄徙并代州鈐轄
管勾麟府軍馬事夏人歲侵屈野河西地至耕獲時輒
屯兵河西以誘官軍嘉祐二年自正月出屯至三月然
後去通判并州司馬光行邊至河西是時知麟州武戡
通判夏倚已築一堡為候望與光議曰乘敵去出不意可
更增二堡以據其地不過二旬壁壘可成然後廢橫戎
臨砦二堡徹其樓櫓徙其甲兵以實新堡列烽燧以通
警急有急則州及橫陽堡出兵救之敵來耕則驅之種

則蹂踐之敵盛則入堡以避如是則堡外必不敢耕種
州西五六十里之內晏然經畧使龐籍遂檄麟州如其
議五月恩及武戡走馬承受公事內侍黃道元等以巡
邊為名往按視之會詞者言敵兵盛屯沙濟蘭恩欲止
不行道元怒以言脅恩夜率步騎六千四百餘人不甲
者半循屈野河北而行無復部伍夏人舉火卧牛峯戡
謂恩曰敵已知吾軍至矣道元曰此爾曹故欲沮我師
行至谷口恩欲休軍須曉乃登山道元奮衣起曰幾年

聞郭恩名今日懦怯與賈逵何殊恩亦愠曰不過死耳
乃行比明至呼喇堆敵數十人皆西走俄而起火敵騎
張左右翼自南北交至堆東有塹其中有梁謂之斡道
塹按長編作斡道塹恩等東據梁口與力戰自旦至食時敵自

兩旁塹中攀援而上四面合擊恩衆大潰夏倚方在紅
樓見敵自西山大下率城中諸軍閉門乘城武戡走東

山趣城東挾門以入恩道元及府州寧府砦兵馬都監

劉慶皆被執

按長編載道元被執後夏人乃遣其還

使臣死者五人軍士

三百八十七人亡失器甲甚衆恩不肯降乃自殺贈同
州觀察使封其妻錄其子弟有差給舊俸二年

按長編載給舊

年 体三 武戡坐棄軍除名編管江州

張岳字子雲府州府谷人以貲為牙將有膽畧善騎射
天聖中西夏觀察使阿裕有子來歸阿裕寇麟州虜邊
戶約還子然後歸所虜麟州還其子而阿裕輒背約安
撫使遣岳詰問岳徑造帳中諭以逆順阿裕語屈留岳
共食和佩刀貫大轡唱岳岳無所憚阿裕撫岳背曰真

男子也。翌日又與岳縱獵，岳發兩矢連斃二兔。阿裕遺
岳馬索，馳悉歸所。虜州將補為來遠砦主，手殺偽首，領
奪其甲馬。時年十八名動一軍。元昊犯鄜延，詔麟府進
兵。岳以都教練使從，折繼閔破朗鴻達爾兩族，以功補
下班殿侍三班差使。時敵騎方熾，中人促賜軍衣，至麟
州不得。前岳馳騎五十往護之，至者眉浪遇賊接戰，流
矢貫雙頰。岳拔矢鬪，愈力奪馬十二匹而還。賊兵攻府
州甚急，城西南隅庫下賊將登衆，囂曰：「城破矣！」岳乘陴

大呼搏賊賊稍却飛矢中右目下身被三創晝夜督守
又帥死士開闢護州人汲于河訖圍解以勞遷為右班殿
直以岳為麟府州道路巡檢至深柏堰遇賊數千分兵
追擊斬首百餘級奪兵械馬牛數百近郊民田比秋成
未敢穫岳以計于張亢得步卒九百人護之大敗賊于
龍門川從諸將通麟州糧道破賊于柏子砦改左班殿
直內侍宋永誠傳詔砦下岳護永誠遇賊三松嶺賊以
精騎挑戰矢中岳臂猶躍馬左右馳射諸將乘勝而進

賊潰特改西頭供奉官又遷內殿崇班賊破豐州岳與
諸將一日數戰破容州刺史耶布移守貴叅砦俘獲萬
計遷禮賓副使明錫在河東以岢嵐軍當雲朔路奏岳
為麟府路駐泊都監兼沿邊都巡檢使張亢修並砦堡
障初議置安豐砦於石臺神岳以為非要害之地遂徙
砦於實特庫堆以扼賊已而本道上言擅易砦地左遷
絳州兵馬都監二州未解嚴復麟府駐泊都監屯安豐
累遷洛苑使嘗從數騎夜入羌中詞機事既還羌覺追

之出隨羌疾馳効羌語與羌俱數里乃得脫前後數中
流矢創發臂間卒

張君平字士衡磁州滏陽人以父承訓與契丹戰死補
三班差使殿侍黔州指揮使獠兵屢入寇君平引兵擊
破之以功遷奉職除駐泊監押徙容白等州巡檢遷右
班殿直以薦擢閤門祇候管勾汴口建言歲開汴口當
擇其地得其地則水湍駛而無留沙歲可省功百餘萬
又請沿河縣植榆柳為令佐使臣課最及瘞汴河流屍

悉從其言天聖初議塞滑州決河以君平習知河事命
以左侍禁簽書滑州事兼修河都監召同提點開封府
界縣鎮公事以嘗護滑州隄有功特遷內殿崇班君平
以京師數罹水災請委官疏鑿近畿諸州古溝洫久之
稍完遂詔畿內及近畿州縣長吏皆兼管勾溝洫河道
自畿至泗州道路多寇君平請兩驛增置使臣專追捕
盜而罷夾河巡檢於是行者無患復為滑州修河都監
遷供備庫副使河平改西作坊使就遷鈐轄卒君平明

於水利死後錄三子官子鞏皇祐中嗣其父職云

盧鑑字正臣金陵人累舉進士不中授三班奉職監坊
州酒稅以右班殿直為廊延路走馬承受公事李繼遷
寇邊與總管王榮敗走之又與鈐轄張崇貴擊賊焚其
積聚斬首級而還擢閭門祇候為本路兵馬都監復出
蕩族帳獲羊牛萬計徙鳳翔秦隴階成等州提點賊盜
公事尋為都巡檢徙利州都監初繼遷聲言石隕帳前
有文曰天誠爾勿為中國患真宗問之鑑曰此詐為之

以欺朝廷也宜益為備至是繼遷陷靈武帝思其言特
遷右侍禁知儀州州有制勝關最險要繼遷欲乘虛襲
取之放言將由此大入諜者以告有詔徙老幼芻粟于
內地鑑曰此姦謀也且示虜弱搖民心臣不敢奉詔卒
不徙已而賊亦不至再遷西頭供奉官知利州會歲饑
以便宜發倉粟振民提點河東路刑獄歷知保州廣信
軍原州就為環慶路都監兼慶州徙環州平瑪爾密族
于合道鎮坐事徙知丹州累遷西京左藏庫使恩州刺

史為環慶路鈐轄兼知環州改西上閤門使知秦州卒
郭諮字仲謀趙州平棘人舉進士歷通利軍司理參軍
中牟縣主簿改大理寺丞知濟陰縣建言澶滑堤狹無
以殺大河之怒故漢以來河決多在澶滑且黎陽九河
之原今若引河出沒于山下穿金堤與橫隴合以達于
海則害可息詔本道使者共議弗合監通利軍稅洺州
肥鄉縣田賦不平歲久莫治轉運使楊偕遣諮攝令以
往既至閉閤數日以千步方田法四出量括遂得其數

除無地之租者四百家正無租之地者百家收逋賦八十萬流民乃復偕奏其才遷殿中丞知館陶縣康定西征諮上戰畧獻拒馬槍陣法其制利山川險隘以騎士試上前擢通判鎮戎軍募兵教習會三司議均稅法知諫院歐陽修言惟諮方田法簡而易行詔諮與孫琳均蔡州上蔡縣稅用宰相呂夷簡薦起為崇儀副使提舉黃御河堤岸時富弼使契丹諮入對陳大水禦戎之要其議決黎陽大河下與胡蘆漳沱後唐河以注塘泊混

界河使東北抵于海上溢鶴鵲陂下注北當城南視塘
泊界截虜疆東至海口西接保塞惟保塞正西水不可
到請立堡砦以兵戍之詔儲用興役會契丹約和而止
知丹利二州王則叛文彥博薦諮知冀州運糧助攻討
賊平徙忻州開渭渠導汾水興水利置屯田轉運使任
顯言諮有巧思自為兵械皆可用詔以所作刻漏圓楯
獨轆弩生皮甲來上帝頗嘉之除益州路兵馬鈐轄累
遷英州刺史後為契丹祭奠副使知汾州未行言獨轆

弩可試改廊延路兵馬鈐轄許置弩五百募土兵教之
既成經畧使夏安期言其便詔立獨轅弩軍以西上閭
門使知潞州又作鹿角車陷馬槍請廣獨轅弩於他道
詔諮置弩千分給并潞諮因上疏曰頃使契丹觀幽燕
地無十萬人一年之費若以術制之使舉不得利居無
以給不踰數年必棄幽州而遁臣經畫河北大水界斷敵
疆乃其術也臣所創車弩若多設之助以大水取幽薊
如探囊中物爾時三司議均田租召還諮陳均括之法

四十條復上平燕議曰契丹疆土雖廣人馬至少儻或南牧必率高麗渤海黑水宮真室韋等國會戰其來既遠其糧匱之以臣所見請舉慶厯之策合衆河於墉泊之北界以限戎馬然後以景德故事頻兵自守又旁河郡邑可以水運以給保州應援來則戰去則勿追幽州糧儲既少敵不可久留不半年間當遁沙漠則進兵斷古北口砦松亭關傳檄幽薊燕南自定且彼之所恃者惟馬而已但能多方致力使馬不獲伸用則敵可破幽

燕可取詔置獨轅弩二萬同提舉百司及南北作坊以
完軍器諸嘗謂作汴乘素河三十六陂之流危京師請
自鞏西山七里店孤株嶺下鑿七十里導洛入汴可以
四時行運詔都水監楊佐同往計度歸未及論功而卒
田敏字子俊本易州牙吏雍熙中王師討幽薊曹彬進
兵涿州敵斷其後王繼恩募勇士持書抵彬敏應募間
行由祁溝關按宋史曹彬傳作岐溝關應作岐溝達相州彬得詔選壯士
五十人衛敏還道遇賊力戰僅以身免彬上其事太宗

召見復令齎詔諭彬師還補敏易州靜岩指揮使端拱初以所部兵屯定州契丹攻北唐河大將李繼隆遣部將逆戰為敵所乘奄至水南敏以百騎奮擊敵引去又出狼山襲契丹至滿城獲首級甚衆既而敵陷易州敏失其家所在帝擢敏本軍都虞候使間行求其父母得之以歸徙屯鎮州李繼隆討夏州奏隸麾下敏率兵至靈州遇敵斬獲數萬計繼隆上其功遷御前忠佐馬步軍副都軍頭既而又從傅潛于定州時契丹斷蒲陰路城中

軍士千餘人不敢戰敏率輕騎復出之真宗幸天雄軍
詔敏隸高瓊使追賊至寧遠軍以功領涿州刺史王均
亂西川從招安使雷有終敗賊于靈池山賊平遷馬步
軍都軍頭咸平中契丹復入寇敏從王顯為鎮定先鋒
大敗之於遂城西羊山真授單州刺史後為邢州兵馬
鈐轄從王起屯定州遇契丹於望都逆戰斬首二千餘
級徙北平砦兵馬鈐轄領騎兵五千以當其衝先是兩
地供輸民多為契丹鄉導敏自魚臺北悉驅南徙凡七

百餘戶送定州遷北平砦總管復敗契丹於楊村敏諜知契丹主去北平十里蒲陰駐砦夜率銳兵襲破其營契丹主大驚遂引去敵攻瀛州不下欲乘虛犯貝魏詔敏與魏能張凝三路兵入敵境縱擊以牽其勢敏出西路屯師石村虜獲人畜鎧仗以萬計還定州遇敵于鎮州之北復大破之契丹請和乃徙敏鎮定路都鈐轄遷本州團練使充鎮定路總管徙永興軍陝州歷廊延環慶鳳翔三路久之為環慶路都總管時後橋屬羌數擾

邊敏誅違命者十八族又敗羅古於三店川遷鄭州防禦使涇原路總管復徙環慶坐與部豪往還降左屯衛大將軍昭州防禦使既而以虢州團練使知隰州復為環慶路都總管儀州防禦使卒

侍其曙字景升父稹左監門衛大將軍曙以父任為殿前爭旨改右班殿直咸平中以閤門祇候為蘇杭湖秀等州都巡檢使遷左侍禁領東西排岸司與謝德權提舉在京倉草場嘗於倉隙地牧牛羊為德權所訟真宗

以問德權曰牛羊食倉粟邪曙聞而自劾帝勉諭之有
告永興民李琰將作亂命曙往按之捕琰黨三十餘人
皆伏法青州卒龐德訟其校李緒謀以衆叛帝疑其誣
又命曙至青州劾無驗遂棄德市知青州張齊賢奏曙
擅戮人帝曰不爾無以安被告者進曙東頭供奉官改
內殿崇班祥符二年黎州夷人為亂詔曙乘驛往招撫
其首曙按行鹽井夷人復叛曙率部兵百餘生擒首領
三人斬首數十級因上言蠻阻險拒命請必加討詔知

慶州孫正辭環慶駐泊都監張繼勲領陝西兵同曙俱
進所至皆降曙又請誅之真宗謂王旦曰已降而殺之
何以信四夷不許遷內殿承制再遷如京副使知登州
會歲饑請漕江淮米以賑貧乏活者甚衆累遷西京作
坊使惠州刺史知桂州徙滑州遷西上閤門使徙鄆州
提舉在京諸司庫務卒

康德輿字世基河南洛陽人父贊元崇儀使武州刺史
以功錄德輿三班奉職遷右班殿直涇原路走馬承受

擢閭門祇候河蓄陽武埽詔遣德輿完築歷開封府西路都巡檢勾當權貨務皆兼領埽事改巡護開封府等六州黃河堤岸天聖中使夏州還勾當汴口改西頭供奉官用薦遷內殿崇班河陰兵馬都監建沿汴斗門以節水會積雨汴水將溢德輿請自京西導水入護龍河水得不溢歷知原州慶州益州路兵馬鈐轄久之領昭州刺史徙并代兵馬鈐轄管勾麟府路軍馬事有蕃部密羅為殿侍有譖與賊通戰則反射漢人密羅無以自

明乃謀附賊指揮張岳以告德輿曰不可不殺德輿不聽岳曰請為君召與飲仆崖谷中聲言墮馬死安知漢殺之德輿猶預不決岳計不得行賊果以密羅為嚮導自後河川入龔府州蕃漢欲入城德輿閉門不納或降賊或為賊所殺不可勝計賊既圍府州德輿與馬步軍副總管王元兵馬鈐轄楊懷忠按兵不出戰但移文轉運司調軍食轉運副使文彥博籍軍輦運至境以俟而德輿等終不出及陷豐州纔出屯州城數里三日而還

居民望見以謂寇復至皆棄其所齎入保城郭然朝廷
不悉聞德興止坐不出戰降為東染院使河陽兵馬都
監尋復昭州刺史知保州徙真定府定州路總管歷知
代石儀三州大名府路鈐轄提舉金堤累遷西上閤門
使至和中河決小吳埽破東堤頓邱口居民避水者趨
堤上而水至不得達德興以巨船五十順流以濟之遂
免墊溺復領果州團練使知冀州徙趙州有告雲冀卒
謀以上元夜劫庫兵為亂德興會賓屬燕飲自若陰遣

人捕首謀誅之徙陳州鈐轄卒

張昭遠字持正滄州無棣人父凝殿前都虞候寧州防禦使契丹內寇凝與康保裔伏兵瀛州陷圍中昭遠年十八挺身拔出之擢左班殿直寄班祇候為忻州都巡檢改閤門祇候知狄山軍管勾河東緣邊安撫司再遷內殿崇班天禧初除西上閤門副使俄為河北緣邊安撫副使尋知瀛州改東上閤門副使知定州以引進副使復知瀛州遷西上閤門使會大雨陂塘大溢昭遠勒

兵築長堤以捍其衝徙廊延路兵馬鈐轄進都鈐轄築
堡成平川領忠州刺史知成德軍遷四方館使溥沱河決
壞城郭乃修五關城外環以堤民至今為利擢捧日天
武四廂都指揮使新州防禦使歷安軍馬軍都虞候嘉
州防禦使知代州召還改莫州防禦使罷管軍授左龍
武軍大將軍昭州防禦使卒特贈應州觀察使